



TOLOSAKO
UDALA

AZAROAREN 25a, EMAKUMEENGANAKO INDARKERIAREN KONTRAKO NAZIOARTEKO EGUNA

MOZIOA

COVID-19aren pandemiak gure bizitza eta komunitateak kolokan jarri ditu, eta pertsona guztien osasunari, segurtasunari, ongizateari eta komunitate-bizitzari erronka handia jarri die. Aldatzen ari da mundua ulertzeko eta bertan egoteko dugun modua. Konfinamenduak, mugimendu-murrizketek eta harreman-mugek agerian utzi dituzte, gordintasun osoz, indarkeria matxista mota guztiei aurre egiten ari diren emakumeen egoera oso ahulak; zaurgarriak are egoera zaurgarriagoan jarri ditu.

Krisi-testuinguru guztiak, pandemia honekin gertatzen den bezala, indarkeria matxista hazteko, biderkatzeko eta ugaritzeko haztegi bat dira. Indarkeria hori botere-harreman desorekatuen eta emakumeen aurkako diskriminazioaren adierazpen bat da, eta pairatzen ari garen krisi sanitario, sozial eta ekonomikoaren ondorioz larriagotu egiten da. Hala, egun bizi duguna zaintza-krisia ere badela bistan geratu da.

Pandemiak sortutako egoeran, arreta jarri behar dugu beren etxeetan, lanetan eta bizi-espazioetan bizirik irauteko indarkeriari aurre egiten ari diren emakumeengan eta neskeengan. Gizartearen aitortpen eta elkartasun osoa merezi dute. Testuinguru horretan, lanean jarraitu behar dugu isolamendua, babesgabetasuna eta ikusezintasuna saihesteko baldintza egokiak sortzeko, herritik hasi eta lurralde osoraino, zaintza sareak sortuz eta indartuz, erreferentziazko izango diren Emakumeen Etxeak eraikiz eta ikuspegi feminista instituzioetan ez ezik, herritar ororen begiradan ere txertatuz.

Aurten Euskal Herrian hildako lau emakumeak gogoratu nahi ditugu bereziki gaur, bi, EAEn, eta beste bi, Iparraldean. Errealitate mingarri horrek gizarte gisa interpelatu egiten gaitu, lanean jarraitzeko eta mobilizatzeko konpromisoa hartzeko, horrelakorik gerta ez dadin. Erailketa gisa ez ezik, indarkeria matxista beste hamaika modutara ere gorpuztu daiteke, eta batera nahiz bestera zapalduak eta estutuak diren horiei gure elkartasuna adierazi nahi diegu.

Hala ere, horrekin EZ DA NAHIKOA. Konpromiso politiko argia behar dugu, gizarteak erakundeei eskatzen baitie emakumeen aurkako indarkeria matxista lehentasun politiko bihur dezatela. Eta argi daukagu, horrek gure lehentasuna izan behar duela eta dela. Inoiz ez bezala, zerbitzu publikoen eta erakundeen laguntza eta baliabide guztiak behar dira, emakumeei beren askapen-, berreskuratze-, ahalduntze- eta autonomia-prozesuetan laguntzeko. Hori ezinbestekoa da emakumeek berreskura dezaten oinarritzko eskubide hau: duintasunez eta segurtasunez bizitzea merezi duen bizitza bat izateko eskubidea. Baldintza da, gainera, gure herriak eta hiriak sendotu daitezen bizikidetza berdinzale, seguru eta solidarioko gune gisa.

Herritarrengandik hurbil gaudenez, gure Udaletik ahotsa jarri nahi diogu Tolosako udalherriak eta Tolosako emakume feministek emakumeekiko eta indarkeria matxistaren beste biktima batzuekiko duten elkartasunari. Gure erantzukizuna gure gain hartzen dugu, erakundeekin, kolektibo feminista eta emakumeen kolektiboekin, aditu eta gizarteko eragile guztiekin lankidetzan eta koordinatuta.



TOLOSA
UDALA

Horregatik guztiagatik, Tolosako Udaleko Osoko Bilkurak bere jarrera berretsi du, emakumeei indarkeria sexistarik gabe bizitzeko eskubidea bermatzeko, eta erantzukizuna hartzen du bakoitzak beretik eragiteko baina guztiok bat eginda erantzuteko egoera honi. Tolosako Udalak, beraz, konpromiso zehatz hauek hartzen ditu bere gain:

- Indarkeria sexistaren biktima diren emakumeen eskubideak zaintza prozesu guztiaren erdigunean kokatzea, haien beharrak eta eskaerak entzunez eta zainduz, politika berriak diseinatzeko babeserako, arretarako eta erreparaziorako eskubidea bermatzeko eta ez ez direla errepikatuko bermatzeko. Era berean, abian jartzea gaur egun bizi dugun alarma sanitario, ekonomiko eta sozialaren egoerara egokitutako jarduerak.
- COVID-19aren krisiak emakumeen pobretzean eta zaurgarritasunean duen eragina aztertzea, laguntzeko ekintza zehatzak diseinatzeko, eta, modu horretan, programak, baliabideak eta arreta zerbitzuak behar berri horietara egokitzeko eta/edo haiek hobetzeko. Horretarako, erakundeek bere artean lankidetzan eta koordinatuta jardun behar dute, bere eskumenen esparruan, eta Mugimendu Feministarekin eta Tolosako ehun sozialarekin harremanetan eta lankidetzan estuan.
- Genero indarkeria eta sexu erasoak jasan dituzten emakumeen arreta hobetzeko erakunde arteko Ekintza eta Koordinaziorako Bigarren Tokiko Protokoloa prestatzea, bere ebaluazioan adierazitako gomendioak txertatuta. Eta egokia bada, erakundeen arteko koordinazioa hobetzeko beharrezkoak diren baliabideak, zerbitzuak eta prozedurak sortu eta/edo egokitzea, eta arreta onena eta laguntza handiena eskaintzea indarkeria jasaten duten emakumeei eta haien familiei, ahalduntze feministaren eta erreparazio kolektiboaren eta indibidualaren ikuspegitik.
- Ikastetxeetako eskola-komunitate osoari zuzendutako hezkidetzaproiektua indartzen jarraitzea, eta nerabeak eta gazteak sentsibilizatzeko eta haiei prestakuntza emateko zereginarekin jarraitzea, egungo egoerara egokituta, indarkeria matxistaren formak desnatularizatzeko, eta arreta jarrita neskak ahalduntzeko eta mutilen maskulinitate-eredua zalantzan jartzeko, eta horrela, mota guztietako erasoak detektatzeko eta prebenitzeko eta harremanak sustatzeko. Eta, era berean, ikastaroak eskaintzea, hezkuntza sistema osatzen dutenei ez ezik, instituzioetako langileei eta politikoei ere bai, ikuspegi feminista politiketan txertatu dadin.
- Udalerriko bizitzan berdintasun programak zaindu eta finkatzea, desberdinkeriak areagotzearen aurka egiteko, izan ere, emakume talde batzuen ahultasun egoerak okerragotu egiten baitituzte; eta erantzunkidetasunak eta mendekotasunen bat dutenen zaintzak eragindako desberdinkerien aurka egiteko ere bai, zeregin horiek emakumeek egiten dituzte-eta gehien bat oraindik ere.
- Jabekuntza Eskolako tailer eta jardueren eskaintza handitzen eta hobetzen jarraitzea, ahalduntze prozesuak indibidualak eta kolektiboak indartzeko helburuarekin, trukerako espazioak eskainiz, norik bere burua babesteko eta indarkeria matxistaren salaketa publikoaren aldeko ekintza kolektiboak sustatzeko.



TOLOSAKO
UDALA

- Eta, jakina, Tolosako udalak Tolosaldeko Emakumeen Etxea proiektuaren garapena erraztuko du, indarkeria matxistaren eta, oro har, feminismoaren aurkako borrokan erreferentziazko leku segurua eta solidarioa izango dena.

Era berean, tolosarrei dei egiten diegu emakumeen aurkako indarkeriaren aurkako eguna dela eta mugimendu feministak deitutako mobilizazioekin bat egin dezaten.

Tolosan, 2020ko azaroaren 23an

JOSEBA ORMAZABAL LOPEZ
EAJ-PNV

ANDER FIGUERIDO ZUBIRIA
EHBILDU

JOSE MARIA VILLANUEVA TELLERIA
PSE